

Fisketuristar vert overvakt

Båtutleigarar er lei turistar utan sjøvett. Nautnes Fiskevær brukar GPS for å passe på turistane sine.

**BORGHILD BERGE
SILJE KATRINE ROBINSON (foto)**
borghild.berge@bt.no
Nautnes

– Der framme sjekkar du at det er bensin, og du startar båten med å trykka på denne knappen. Får du problem, så er dette siste utveg, seier Ove Forstrønen og held opp eit nødbluss.

Svenske Bosse Johansson nikkar lydig. Han ferierer på Nautnes i Øygarden saman med kona. Før dei får lov til å dra ut med båt, må dei gjennom eit tryggleikskurs.

– Angsten er der heile tida, særleg om vinteren. Kollegaen min kallar det ekstrem sport. Men heldigvis har me ikkje hatt ulykker her, seier Ove Forstrønen, eigar av Nautnes Fiskevær.

Slutta etter ulykke

I mai i år omkom to tyske fisketuristar etter å ha forlist i ein liten båt i Masfjorden. Og seinast for to veker sidan drukna ein svensk familiefar og hans seks år gamle dotter etter at båten dei sat i gjekk rundt i ei elv i Telemark.

Terje Vangsnes ved Nautnesund Camping og Hytter i Nordhordland tilbyr leige av småbåtar til sine gjester. Han er redd det skal skje igjen.

– Me er nervøse heile tida. Ein kollega av meg slutta med båtutleige etter at ein av gjestene hans kom ut for ei ulykke. Det gjekk så hardt inn på han, seier Vangsnes.

Turistar overrepresenterte

I 2008 mista 30 personar livet i ulykker med fritidsbåt i Norge, men ifølgje Sjøfartsdirektoratet finst det ikkje sikre tal på kor mange av desse som var utanlandske turistar.

Men redningsinspektør Stein Solberg ved Hovudredningssentralen Sør-Norge seier til BT at utanlandske turistar er overrep-

sentert på ulykkesstatistikken.

– Utanlandske fisketuristar får oftare problem enn nordmenn, både på sjøen og i innlandet. Det som gjerne skjer er at båten går rundt, at dei får motorproblem, eller at ein mann fell over bord, seier Solberg.

Bjørn Bjerke er regiondirektør i NHO Reiseliv, og har jobba mykje med fiske- og båtturisme. Han seier at mange båtutleigarar har god grunn til å vera uroa.

– Dei utanlandske turistane har ikkje fått den same grunnopplæringa i norsk natur som nordmenn har. Ein turist frå Hamburg veit ikkje nødvendigvis at det ikkje er lurt at fleire personar står i båten samtidig, seier Bjerke.

For å betra tryggleiken har NHO Reiseliv utarbeidd ei sjekkliste, som utleigar og turist kan gå gjennom saman før turisten får leggja frå kai. Både utleigar og turist må signera på sjekklisten etterpå.

– Når ein signerer på noko, tar ein det automatisk meir alvorleg. Målet er å gjera Norge tryggast mogleg, seier regiondirektøren.

Tryggleik kostar

Tilbake på Nautnes Fiskevær har fire regnvåte tyskarar akkurat lagt til kai. Håret klistrar seg til panna og fingrane er kalde – men det gjer ingenting så lenge fangsten er god.

– Dei er veldig opptekne av tryggleik her på Nautnes. Me har alltid på oss

redningsvest, og dreg aldri ut på sjøen når det er dårlig vær. Og det er bra å ha GPS, seier Holger Sylvester, som er frå ein liten by utanfor Hamburg.

Nautnes Fiskevær har installert GPS i dei fem mest brukte båtane sine.

– GPS er framtida. Viss ikkje gjestene kjem tilbake til avtalt tid om kvelden, kan me berre gå inn på datamaskina og sjå kvar dei er. Men tryggleik kostar. Ikkje alle utleigarar har råd til å prioritera det like høgt, seier han.



KURSING: Ove Forstrønen (til venstre) på Nautnes Fiskevær har tryggleikskurs for alle sine gjester før dei får leggja frå kai åleine. – Eg er veldig



DAGENS FANGST: Tyske Holger Sylvester (til høgre) har vore på fiskeferie i Norge over tjue gonger, og har alltid redningsvesten på. Han og nevøen Carsten Sylvester er storfornøyd med fangsten.



GPS-OVERVAKING: Nautnes Fiskevær har installert GPS i fleire av sine båtar. – Å ha bra utstyr er viktig for tryggleiken, seier eigar Ove Forstrønen.